

KHUTBAH JUMAAT

“MEMBACA DAN MENTADABBUR AL-QURAN” (07 April 2023M/ 16 Ramadan 1444H)

الْحَمْدُ لِلَّهِ، الْحَمْدُ لِلَّهِ الَّذِي جَعَلَ رَمَضَانَ شَهْرًا مُبَارَكًا، وَفَرَضَ فِيهِ الصَّيَّامَ وَأَعَدَّ فِيهِ فَضْلًا كَبِيرًا وَأَجْرًا عَظِيمًا. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى سَيِّدِ الْمُرْسَلِينَ، حَبِيبِنَا الْكَرِيمِ، وَرَسُولِنَا الْعَظِيمِ، سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.
أَمَّا بَعْدُ، فَيَا أَيُّهَا الْمُسْلِمُونَ، أُوصِيكُمْ وَنَفْسِي بِتَقْوَى اللَّهِ عَزَّ وَجَلَّ، فَقَدْ فَازَ الْمُتَّقُونَ.

Kaum muslimin yang dirahmati Allah,

Marilah kita bersama-sama meningkatkan ketaqwaan kepada Allah *subhanahu wata'ala* dengan menunaikan segala perintah-Nya dan meninggalkan segala larangan-Nya. Semoga kita beroleh kejayaan, kebahagiaan dan keselamatan di dunia dan di akhirat.

Khatib mengingatkan para jemaah agar memberi sepenuh perhatian kepada khutbah yang akan disampaikan dan tidak melakukan perkara-perkara yang boleh mengurangkan pahala Jumaat seperti berbual-bual dan menggunakan telefon. Marilah kita bersama-sama mendengar dan menghayati khutbah yang bertajuk :
‘Membaca Dan Mentadabbur Al-Quran’.

Kaum muslimin yang dirahmati Allah,

Al-Quran adalah kitab yang memberi petunjuk dan panduan kepada manusia ke jalan yang benar supaya tidak tergelincir ke jalan kesesatan. Hanya mereka yang berpegang teguh dengan kitab suci ini akan beroleh kejayaan dan kebahagiaan di dunia dan akhirat. Firman Allah *subhanahu wata'ala* dalam surah al-Isra', ayat 9:

إِنَّ هَذَا الْقُرْآنَ يَهْدِي لِلَّتِي هِيَ أَقْوَمُ وَيُبَشِّرُ الْمُؤْمِنِينَ الَّذِينَ يَعْمَلُونَ الصَّالِحَاتِ أَنَّ لَهُمْ أَجْرًا كَبِيرًا ﴿٩﴾

Maksudnya: *Sesungguhnya, al-Quran ini memberi petunjuk ke jalan yang betul (Agama Islam), dan memberikan berita yang mengembirakan orang yang beriman yang mengerjakan amal-amal soleh, bahawa mereka beroleh pahala yang besar.*

Untuk memperolehi ilmu daripada al-Quran umat Islam hendaklah membaca al-Quran sebagai langkah pertama dan utama untuk memperolehi ilmu tersebut. Membaca al-Quran merupakan zikir yang paling utama dan mendapat ganjaran yang besar di sisi Allah *subhanahu wata'ala*. Firman Allah *subhanahu wata'ala* menerusi surah Fatir, ayat 29:

إِنَّ الَّذِينَ يَتْلُونَ كِتَابَ اللَّهِ وَأَقَامُوا الصَّلَاةَ وَأَنْفَقُوا مِمَّا رَزَقْنَاهُمْ سِرًّا وَعَلَانِيَةً يَرْجُونَ تَجْرَةً لَّنْ تَبُورَ ﴿٢٩﴾

Maksudnya: Sesungguhnya, orang yang selalu membaca Kitab Allah (al-Quran) dan tetap mendirikan sembahyang serta mendermakan dari apa yang Kami kurniakan kepada mereka, secara bersembunyi atau secara terbuka, mereka (dengan amalan yang demikian) mengharapkan sejenis perniagaan yang tidak akan mengalami kerugian;

Rasulullah *sallallahu alaihi wasallam* juga pernah memberi jaminan tentang ganjaran yang akan dikurniakan oleh Allah *subhanahu wata'ala* kepada pembaca al-Quran. Daripada Abdullah bin Mas'ud *radiallahu anhu* bahawa Nabi *sallallahu alaihi wasallam* bersabda:

((مَنْ قَرَأَ حَرْفًا مِنْ كِتَابِ اللَّهِ، فَلَهُ بِهِ حَسَنَةٌ، وَالْحَسَنَةُ بِعَشْرِ أَمْثَالِهَا، لَا أَقُولُ الْم حَرْفٌ، وَلَكِنْ أَلِفٌ حَرْفٌ، وَلَاَمٌ حَرْفٌ، وَمِيمٌ حَرْفٌ))

Maksudnya: Sesiapa yang membaca satu huruf daripada kitab Allah (al-Quran) maka baginya satu kebaikan, dan kebaikan itu digandakan dengan sepuluh kebaikan sepertinya, aku tidak berkata 'Alif Lam Mim' satu huruf, tetapi 'Alif' satu huruf, 'Lam' satu huruf dan 'Mim' satu huruf.

(Hadis riwayat Imam at-Tirmizi)

Bagi mereka yang selalu membaca al-Quran sehingga mahir membacanya akan mendapat kelebihan di hari kiamat kelak. Namun, ganjaran tetap diberi untuk mereka yang masih belajar dan belum mahir membacanya. Daripada 'Aisyah *radiallahu anha*, Rasulullah *sallallahu alaihi wasallam* bersabda:

((الْمَاهِرُ بِالْقُرْآنِ مَعَ السَّفَرَةِ الْكِرَامِ الْبَرَّةِ، وَالَّذِي يقرأ الْقُرْآنَ وَيَتَتَعْتَعُ فِيهِ، وَهُوَ عَلَيْهِ شَاقٌّ لَهُ أَجْرَانِ))

Maksudnya: *Seorang yang mahir membaca al-Quran akan bersama para malaikat yang mulia dan sentiasa taat kepada Allah, dan bagi yang membaca al-Quran namun tersangkut-sangkut dan bersusah payah untuk membacanya, maka baginya itu dua ganjaran.*

(Hadis riwayat Imam Muslim)

Justeru, kita dianjurkan untuk selalu membaca al-Quran lebih-lebih lagi di dalam bulan Ramadan yang penuh keberkatan ini. Allah *subhanahu wata'ala* juga lipat gandakan pahala ibadat wajib dan juga yang sunat yang dilakukan di dalam bulan ini. Jadi, marilah kita mengambil kesempatan yang amat berharga ini untuk hadir ke masjid menunaikan solat fardu dan solat sunat tarawih secara berjemaah serta memperbanyakkan sedekah di samping meningkatkan pembacaan al-Quran kita.

Kaum muslimin yang dirahmati Allah,

Kita juga seharusnya sedar bahawa al-Quran diturunkan bukanlah semata-mata untuk dibaca sahaja tetapi untuk ditadabbur, dihayati dan diamalkan dalam kehidupan seharian. Maka dengan itu, kita dapat mengetahui dan memahami isi kandungan al-Quran sekaligus akan memberi kesan yang baik kepada diri kita sebagaimana amalan para sahabat nabi Sallallahu alaihi wasallam yang mengambil berat dan berusaha bersungguh-sungguh

mengamalkan apa yang terkandung di dalam al-Quran. Imam Hasan al-Basri *rahimahullah* pernah berkata:

“Para sahabat memandang al-Quran sebagai surat daripada Tuhan mereka. Mereka mentadabburnya pada waktu malam dan mengamalkan isi kandungannya pada siang hari”.

Cara untuk kita mentadabbur al-Quran adalah dengan memahami terjemahannya bagi menghayati maksudnya. Kini, terdapat banyak kitab terjemahan bagi al-Quran termasuklah dalam Bahasa Melayu. Kita boleh merujuk terjemahan tersebut sekiranya tidak mahir berbahasa Arab. Namun, perlu diingat, kita hendaklah memastikan bahawa terjemahan al-Quran tersebut telah disahkan benar oleh pihak berkuasa terutamanya Kementerian Dalam Negeri (KDN).

Kaum muslimin yang dirahmati Allah,

Marilah kita bersama-sama mengambil peluang keemasan pada bulan yang mulia ini untuk mengisi waktu yang terluang dengan membaca al-Quran bagi meraih ganjaran pahalanya sekaligus mentadabbur isi kandungannya dengan baik. Sematkan di dalam hati dengan keazaman yang tinggi untuk istiqamah mempelajari dan memahami maksud ayat-ayat al-Quran.

Mudah-mudahan, usaha yang murni tersebut akan dapat memberi kesan kepada akhlak dalam diri kita melalui perbuatan, sikap dan amalan seharian. Akhirnya akan melahirkan umat Islam yang unggul dan cemerlang kesan daripada tadabbur al-Quran.

Seterusnya, marilah kita mengambil beberapa rumusan daripada khutbah pada hari ini, antaranya:

Pertama : Umat Islam hendaklah meyakini bahawa perintah untuk mentadabbur al-Quran merupakan perintah Allah *subhanahu wata'ala* yang wajib dipatuhi

Kedua : Umat Islam hendaklah berazam untuk istiqamah membaca al-Quran bagi meraih ganjaran pahalanya.

Ketiga : Umat Islam hendaklah berusaha untuk mempelajari, memahami, menghayati dan mengamalkan isi kandungan al-Quran dalam kehidupan seharian.

Akhirnya, marilah bersama-sama kita menghayati firman Allah *subhanahu wata'ala* dalam Surah an-Nisa', ayat 82:

أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ.
أَفَلَا يَتَذَكَّرُونَ أَلْقُرْآنَ ۚ وَلَوْ كَانَ مِنْ عِنْدِ غَيْرِ اللَّهِ لَوَجَدُوا فِيهِ اخْتِلَافًا كَثِيرًا

Maksudnya: *Patutkah mereka (bersikap demikian), tidak mahu memikirkan isi Al-Quran? kalaulah Al-Quran itu (datangnya) bukan dari sisi Allah, nescaya mereka akan dapati perselisihan yang banyak di dalamnya.*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الْآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ
الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ لَعَلَّكُمْ تُفْلِحُونَ.

Kaum Muslimin yang dirahmati Allah,

Mimbar menyeru agar kita sentiasa berwaspada dan mengikuti nasihat yang diberikan oleh pihak berkuasa dari masa ke masa sama ada yang berkaitan dengan kemungkinan banjir mahupun keadaan perairan untuk apa sahaja aktiviti. Pada masa yang sama, kita hendaklah sentiasa melakukan kawalan sendiri dengan sebaik-baiknya bagi mengelakkan terdedah kepada bahaya wabak penyakit. Teruskanlah memohon keampunan dan bermunajat kepada Allah *subhanahu wata'ala* agar diangkat segala wabak dan musibah daripada kita dan dikurniakan keselamatan dan kesejahteraan buat diri, keluarga, masyarakat, negeri dan negara.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا



اَللّٰهُمَّ صَلِّ عَلٰى سَيِّدِنَا مُحَمَّدٍ وَعَلٰى اٰلِ سَيِّدِنَا مُحَمَّدٍ، كَمَا صَلَّيْتَ
عَلٰى سَيِّدِنَا اِبْرَاهِيْمَ وَعَلٰى اٰلِ سَيِّدِنَا اِبْرَاهِيْمَ، وَبَارِكْ عَلٰى سَيِّدِنَا
مُحَمَّدٍ وَعَلٰى اٰلِ سَيِّدِنَا مُحَمَّدٍ، كَمَا بَارَكْتَ عَلٰى سَيِّدِنَا اِبْرَاهِيْمَ
وَعَلٰى اٰلِ سَيِّدِنَا اِبْرَاهِيْمَ، فِي الْعَالَمِيْنَ، اِنَّكَ حَمِيْدٌ مَّجِيْدٌ.
اَللّٰهُمَّ اغْفِرْ لِلْمُسْلِمِيْنَ وَالْمُسْلِمَاتِ وَالْمُؤْمِنِيْنَ وَالْمُؤْمِنَاتِ الْاَحْيَاءِ
مِنْهُمْ وَالْاَمْوَاتِ. اِنَّكَ سَمِيْعٌ قَرِيْبٌ مُّجِيْبُ الدَّعَوَاتِ وَيَا قَاضِيَ
الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah! Kurniakanlah kami rezeki yang halal lagi diberkati, hindarilah kami dari sebarang bentuk gejala rasuah dan pelanggaran kepada peraturan dan undang-undang. Kurniakanlah keselamatan dan kesejahteraan, jadikanlah kami ummah yang

berkualiti dan berintegriti demi mencapai negara yang aman dan makmur serta mendapat perlindungan-Mu, ya Allah.

Ya Allah, Ya Dzal Jalali Wal Ikram! Ya Allah, kukuhkanlah perpaduan dan kesatuan kami dalam aqidah, ibadah dan akhlak di bawah pegangan Ahli Sunnah Wal Jamaah. Limpahkanlah ke atas kami nikmat keselamatan, kesihatan dan keafiatan. Kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit.

Ya Allah ! Kurniakanlah kepada kami kekuatan untuk mengejar segala kebaikan yang telah Engkau sediakan dalam bulan Ramadan Al-Mubarak ini. Jauhkanlah diri kami daripada godaan nafsu yang akan merosakkan proses peribadatan dan perhambaan kami kepadaMu sepanjang bulan yang agung ini, ya Allah.

رَبَّنَا أْتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ
عَنِ الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ
الْعَظِيمَ يَذْكُرْكُمْ. وَاشْكُرُوهُ عَلَىٰ نِعَمِهِ يَزِدْكُمْ. وَاسْأَلُوهُ مِنْ فَضْلِهِ
يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.